

# Hoofstuk 26

## Jacobus Wessel Beneke (c6)

### (1808 - ?)

---

#### Oriëntasie

Jacobus<sup>1</sup> Beneke is gebore in 1808. Hy was 'n handelaar en karweier.

Toe Jacobus 25 jaar oud was, trou hy met Susanna<sup>2</sup> Raats. Sy is omstreeks 1808 gebore..

#### Genealogiese gegewens

c6 **BENEKE, Jacobus Wessel**: \*8.4.1808<sup>3</sup>; ≈Tulbagh 27.9.1808<sup>4</sup>.

x 6.10.1833<sup>5</sup>: **RAATS, Susanna Hendrina**<sup>6</sup>: \*28.1.1808<sup>7</sup>; ≈Stellenbosch 5.12.1809<sup>8</sup>. Dogter van Jasper Raats en Magdalena Johanna le Roux<sup>9</sup>.

#### Jeug

Jacobus is op 27 September 1808 gedoop te Tulbagh. Hy trou op 6 Oktober 1833 met Susanna Hendrina Raats, die tweede van die dertien kinders van Jasper Raats en Magdalena Johanna le Roux.<sup>10</sup>

Susanna is 'n vierde geslag Raats. Die stamvader Jasper Raats was van Utrecht, en in 1707 'n skoenmaker aan die Kaap. Hy trou in 1709 met Wilhelmina Vermeulen. Na haar dood trou hy in 1714 met Susanna Terrier. In 1718 trou hy met Magdalena Bastiaanse, wat die ouma van Susanna was.

*J. Susanna Hendrina geb: 28 Nov 1808 ged. 5 de  
 Rivier Sonder end Vad: Jasper Raats  
 Moed: Magdalena Johanna le Roux  
 Gett: Abraham le Roux Susanna  
 Margaretta Maria Carol Swart  
 Adriaan Willemina le Roux*

Doopinskrywing van Susanna Raats in die doopboek van die kerk te Stellenbosch: 1809

Susanna Hendrina geb: 28 Nov 1808 ged(oop) 5de/ Rivier Sonder end

Vad(er): Jasper Raats Moed(er): Magdalena Johanna le Roux

Gett(getuies): ..... Sommige gedeeltes omleesbaar.

*Jacobus Wessel Beneke*

## Woonplekke

In 1832 doen Jacobus aansoek om 'n erf in Worcester. Hy was toe nagenoeg 24 jaar oud. Tussen 1835 en 1843 is vyf van Jacobus en Susanna se kinders gedoop te Caledon.

Daar is reeds in die vorige hoofstuk aangedui dat Worcester 'n eie gemeente gehad het. Die Distrik Caledon en die kerk aldaar<sup>12</sup> is gestig in 1811 in die area wat bekend gestaan het as die Overberg. Binne Caledon Distrik is Villiersdorp in 1843 gestig op die plaas Radyn van Pieter Hendrik de Villiers.<sup>13</sup> Soos hieronder aangedui is Jacobus teen 1858-63 aangedui as komende van Villiersdorp.

Daar is nie duidelike aanduidings oor waar die gesin gewoon het nie, maar dit wil voorkom asof Jacobus van Worcester na Villiersdorp beweeg het en daar gewoon het.



## Eiendom

Op 27 Mei 1832, toe Jacobus ongeveer 24 jaar oud was, doen hy in 'n memorie aan die Goewerneur van die Kaap aansoek om 'n erf 6 in Blok O in Worcester met die doel om daar 'n huis op te rig. Daar word deur die regering aangedui dat die erf per openbare veiling verkoop sal word en dit is nie bekend wat daarna gebeur het nie.<sup>14</sup>

Op 8 Januarie 1846 word 'n hofbevel gemaak dat Jacobus, wonende op of naby De Villiersdorp in die Distrik Stellenbosch, sonder versuim aan Pieter Hendrik de Villiers die bedrag wat hy verskuldig is vir 'n verband van 8.1.1846, moet betaal.<sup>15</sup>

Daar het in 1858 'n proses ten opsigte van Jacobus begin en op 4 April 1863 word daar 'n Likwidasie en Distribusierekening van sy insolvente boedel onderteken. Daar word aangedui dat hy van Villiersdorp en 'n handelaar en karweier is. In die dokumente word aangedui dat hy twee erwe van 'n halwe morg elk in Villiersdorp besit, wat saam verpand is teen £175. Hy het ook 11 morg grond gekoop maar skuld nog £100 daarop. Hy het heelwat skulde gehad, soos bv. ten opsigte van die skuldbewys hieronder, en sy skulde het sy bates oorskry.<sup>16</sup> 'n Vendusie is gehou van sommige van die roerende goed. Dit het bestaan uit 'n bed, 8 borde, 2 ketels, 2 potte, 2 stoele, 'n katel, 'n balie buikplanke en 1 lot yster.

6-11-8  
Den 1<sup>st</sup> Maart 1862  
Villiers Dorp  
Ses Maanden na dese datum  
beloof ik ondergetekene te betalen  
aan den Heer James R Brett oft Zyn  
Neder den somma van Ses en twentig  
Ponden Viertien Sielings en agt Pence  
voor waarde genoten J W Benecke

"Den 1<sup>st</sup> Maart 1862 Villiers Dorp  
Ses maande na dese datum beloof beneden getekeni te betalen aan den Heer James R Brett oft Zyn ?? den  
somma van Ses en twintig Ponden Viertien Sielings en agt Pence voor waarde genoten. J W Benecke".<sup>17</sup>

*Jacobus Wessel Benecke*

## Kerk en gemeenskap

Uit die doopregister van die NG Kerk Caledon word afgelei dat hulle lidmate van dié kerk was.


## Huwelik en gesin

Daar kon nog nie met sekerheid vasgestel word wie al Jacobus en Susanna se kinders was nie. Die name van die ses kinders wat hieronder genoem word, is uit die doopregisters van Caledon<sup>18</sup> en 'n sterfkennisgewing verkry.

- Wilhelm
- Magdalena Johanna (Petronella)<sup>19</sup>
- Susanna Elizabeth
- Johannes Jacobus
- Pieter Daniel
- Jacobus Wessel Pieter.

## Laaste lewensjare

Die sterfdatums van Jacobus en Susanna kon nie vasgestel word nie.



<sup>1</sup> Noemnaam onbekend. Gebruik eerste naam.

<sup>2</sup> Noemnaam onbekend. Gebruik eerste naam.

<sup>3</sup> SAG 1. Bl. 218.

<sup>4</sup> SAG 1. Bl. 218.

<sup>5</sup> SAG 1. Bl. 218.

<sup>6</sup> SAG 1. Bl. 218. 'n Huwelik op 19.11.1833 te Caledon met Barbara Magdalena Kunz word aangetoon. SAG 4, bl. 518 dui aan dat Barbara Magdalena Kunz (≈Swellendam 3.8.1813; †Volksrust 5.11.1887) getroud is op 19.11.1833 met Jacobus Wessel Beukes. Daar kom nie so 'n Beukes voor in SAG 1, ble. 253 – 257. Op die webwerf [www.geni.com/](http://www.geni.com/) word aangedui dat Barbara Magdalene Kunsz (b3c2) \*20.7.1813 te Swellendam en †Wakkerstroom 15.11.1887 getroud is met Gerhardus Johannes Beukes, b9c6d3, waarvoor daar nie 'n huwelik in SAG 1 verstrekkend is nie. Soos elders aangetoon word, word die moeder van Jacobus Wessel se kinders deurgaans in die kerkregisters aangedui as Susanna Hendrina Raats. Die aanduiding van 'n huwelik met Kunsz word gevolglik as foutief aanvaar.

<sup>7</sup> SAG 9. Bl. 19.

<sup>8</sup> SAG 9. Bl. 19.

<sup>9</sup> SAG 9. Bl. 19.

<sup>10</sup> SAG 9. Bl. 19.

<sup>11</sup> Le Roux, J G, Niemandt J J, Olivier, Mariana. 2008. *Bewaarders van ons Erfenis. Worcester*. (Versprei deur die Genealogiese Instituut van Suid-Afrika.)

<sup>12</sup> Lombard, R T J. 1977. *Handleiding vir Genealogiese Navorsing in Suid-Afrika*. Pretoria: Raad vir Geesteswetenskaplike Navorsing, Publikasie Nr. 6. ISBN 0 86965 389 X. Bl.126.

<sup>13</sup> Le Roux, J G, Niemandt J J, Olivier, Mariana. 2008. *Bewaarders van ons Erfenis. Caledon*. (Versprei deur die Genealogiese Instituut van Suid-Afrika.) Bl. 1.

<sup>14</sup> KAB CO 3955. Verw. 120.

<sup>15</sup> KAB CSC 2/2/105. Verw. 16

<sup>16</sup> KAB MOIB 2/976. Verw. 95.

<sup>17</sup> KAB MOIC 2/976. Verw. 779.

<sup>18</sup> Genealogiese Instituut van Suid-Afrika se kopieë van die doopregisters.

<sup>19</sup> KAB MOOC 6/9/370. Verw. 3050. Vermeende kind. Op die sterfkennisgewing word die ouers as Jacobus Wessel Beneke en Susanna Raats aangedui. Hierdie vermeende kind is opgespoor via haar sterfkennisgewing en is nie opgemerk tydens die nagaan van die doopregisters van Caledon waartydens die ander kinders aangeteken is nie. Volgens die sterfdatum en aangeduide ouderdom is sy gebore in November 1837, wat nie moontlik is as in ag geneem word dat Susanna Elizabeth op 11 Junie 1837 gebore is nie. Daar is egter in die Doopregister van Caledon voor die aantekening van die doop van Susanna Elizabeth 'n bladsy wat so dof was dat dit nie gelees kon word nie en dit is moontlik dat die ouderdom verkeerd bereken en aangeteken is op die sterfkennisgewing. Daar word dus ruimte vir haar as moontlike tweede kind geskep.

*Jacobus Wessel Beneke*